

und bitte ehm, dat he minen sonen Iken und mine hausfrouwe Binlip bystandt do ahn ere und recht, alss ick bi sinen vader und freunden faken hebbe dan mit live und gude; und weret saecke, dat min soene Ike affivich worde, dar Godt vor sij, und nene erve nalate, so schall juncker Ede hebben Knipense. Item so geve ick 30 grase landes to Ackum tho sunte Thomas altar, dar Ede Her Gaicken heft. Item tho sunte Wilhadusbuwe hundert stucke goldes. Item so geve ick en timpade span tho Oistringefelde. Item dat ander tho Senwarde. Item so geve ick dem kerckhern, de komen tho miner graft enen jewelicken einen golden Rinschen gulden und den vicarius einen Arn.²⁾ gulden. Item tho Ackum minen pagen als ick ehm plach tho ridende. Item tho Fedderwerde 10 Rinsche gulden in gude. Item broder Gerdt 2 Postulatsgulden tho Jehver. Item broder Hinrick 2 Post. gulden. Item broder Berendt 1 Post. gulden. Item in de kalandt tho Jever 8 Arn.²⁾ gulden. Item up den Sande en koe. Item tho Borden enen R. gulden. Item tho Sedick enen Rinschen gulden. — Item so geve ick Bindlip all dat schmide, dat se heft, dat ick lavede eren broder seligen Alken, vor her Focken, Dodo, Sappen und Fulqua hern, ehr se tho mi quam. Item Binlip schall beholden hundert gulden Rinschgulden, dar unse beyde guder sint, und schall daraf besorgen unsen oldern seelen und unse egen selen. Item den gordell, de uth Senenwerde kercke quam, gaf selige Alke Binlip half und ick Lubbe half. Item so geve ick Binlip den gordell, de ihn Butyaden koft wort. Item so geve ick besunderges Binlip 40 grase landes tho ehre liffucht, dar Hinrick Wilkens up sidt. Item so neme ick dat up mine sele und leste hennefarth, dat ick van salige Renoldes gude nicht hebbe beholden, men ehn hoch span. Item so geve ick Houwa enen gulden rinck und wat min sone ehr untheten heft, dat schall er woll holden werden, na Binlipes rade. Item dat halve erve tho Jathusen gaff my grote Onneke, und dat halve iss min moderlike erve. Item dat erve, dat Peke Lubben heft, is min vaderlike erve sunder alle ansprake. Item de 20 juck landes, dar Rinst up claget, ist min vederlike gevegen und geerfte erve. Item de 2 juck, dar Hysck up claget mit unrechte, is min vaderlike erve. Item Sachs Hinricks erve, dat min vader geven was, schall bliven bi den hilligen; wess dar nicht by is, scholen de hilligen man uthmanen, und mine kinder scholen dar nicht up spreken. — Item so hebbe ick dit testament ihn miner kranckheit so vorramet, alss ick vaken hebbe gesprochen mit geistlichen und werltliken in miner suntheit und dat dat testament warhaftich und rechtferdich is unde schall wesen, so hebbe ick fruntliken angeropen und gebeden, desse erbenomeden mine testamentores, dat gegenwordige testament helpen tho betugende und tho sterckende, und in siner vuller macht tho blivende, den wi umme siner bede willen so gedaen hebben, und hebben des tho mer getuchenisse und orkunde der warheit unse rechte ingesegel witliken hangen laten bynedden dusses testaments. Datum ut supra.

Das gegenwertige cöpey mit dem rechten original uff pargamen geschriebenen undt mitt funff siegeln bekreffügten testament von mir undtenbenendten offenen kay. notarien vleissich collationirt undt von wortt zu wortt gleichlauttendt befunden, uhrkunde ich mit dieser meiner eigenen handt undt nahmensundterzeichnus.

Thomas Preuser
manu propria.

²⁾ Die Urkunde hat aip.